


T272012/2915(15)

15

Harvard College Library Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17						
Lab D502*	95/0/2	81/0/0	66/0/0	51/0/1	35/0/0	20/0/0	29/19/54	55/-39/33	40/9/-43	42/57/29	82/4/79	51/50/-13	50/-28/-29	38/14/16	66/16/18	50/-5/-22	43/-14/21	55/-9/-25	71/-32/0	62/34/60	52/48/17	31/21/-21	72/-23/57	73/19/68



CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY
JAN 20 1940

重鐫朱青巖先生擬編明紀輯畧卷十五

莊烈帝

哈佛大學哈佛東亞圖書館珍藏印

甲戌七年春正月降賊王剛王之臣通天柱等至太

原挾賞巡撫戴君恩設宴誘剛等斬之凡斬四百二

十九人王之臣即約五通○陝西賊陷洵陽偏興安

連陷紫陽平利自河湖廣賊陷房縣保康四川賊陷

興山夔州興安賊破鳳陽陷遷安

南京兵部尚書呂維祺疏言南都鳳泗承天陵寢所

在宜以宿壽襄葉為咽喉淮徐則京師咽喉也乞勅

淮撫楊一鵬急為預備防賊東犯○刑科給事中李

明紀輯畧卷十五 莊烈帝紀

世祺論閣臣溫體仁吳宗達謫外任并罪考選郎中
吳鳴虞山西提學僉事袁繼咸疏言養鳳欲鳴養鷹
欲擊今鳴而箝其口擊而繼其羽朝廷之於言官何
以異此使言官括囊無咎大臣所甚利忠臣所甚憂
且皇上樂聽讜言而天下誤以攻擊貴近爲天子所
厭聞其勢將波靡不止矣上以越職言事切責之○
監視登萊海島太監魏相以給事中莊鰲獻上太平
十二策內一條請撤監視因求罷不允謫鰲獻於外
二月會試以大學士溫體仁吳宗達充考官取李
青等二百人○副將尚有喜盡驅廣鹿長山二島男

子一千四百五名婦女幼丁共二千四百六十六口
先赴瀋陽○總理戶工二部錢糧太監張彝憲請入
覲官投冊以降體統許之山西提學僉事袁繼咸上
言士有廉耻然後有風俗有氣節然後有事功總理
內臣令覲官齎冊皇上報可特在釐別姦弊非欲羣
臣屈膝也乃上命一出靡然從風藩臬守令叅謁平
息得免呵責爲幸夫一人輯瑞萬國朝宗諸臣未覲
天子之光先拜內臣之座士大夫尚得有廉耻乎魏
瑞方張時義子乾兒昏夜匍匐自以爲羞今且白晝
公庭恬不知怪國家覲典二百餘年未聞有此可爲

太息也。上以越職言事，責之。彝憲奏辨，言觀官叅謁，乃所以尊朝廷。繼咸復上言：尊朝廷莫大於典例。知府見藩臬行屬禮典例也。見內官行屬禮亦典例乎？諸司至京投冊吏部各官典例也。先謁內臣亦典例乎？事本典例，雖坐受猶以爲安。事創彝憲，雖長揖祇增其辱。高皇帝立法，內臣不得與外事。若必以內臣繩外臣，會典所不載，上仍切責之。

山陝饑人相食。○廷議以各鎮撫事權不一，互相觀望，宜令重臣開府統攝諸道兵討賊。上以洪承疇爲三邊所恃，未便更易，乃加延綏巡撫陳奇瑜兵部右

侍郎總督陝西山西河南湖廣四川軍務。視賊所向，隨方勦撫。○三月召大學士何如寵入朝。在道屢引疾求還，不允。刑科給事中黃紹杰言：君子小人不能並立，如寵徘徊瞻望，則溫體仁當知所自處矣。乞命體仁引咎辭位，以回天心，慰民望。上惡其狂率，謫外任。

廷試賜劉理順吳國華楊昌祚等進士及第。出身有差。

夏四月辛酉

太清太宗諭曰：國家承天創業，未有棄其國語反襲

他國之語者蒙古諸貝子自棄蒙古之語名號俱學喇嘛卒致國運衰微今我國官名俱因漢文從其舊號夫知其善而不能從知其非而不能省皆未爲得也朕雖未成大業亦不聽命於他國凡我國官名及城邑名俱易以滿語勿仍襲舊嗣後備禦之總兵爲一等公一等總兵官爲一等昂邦章京二等總兵官爲二等昂邦章京三等總兵官爲三等昂邦章京一等副將爲一等梅勒章京二等副將爲二等梅勒章京三等副將爲三等梅勒章京一等叅將爲一等甲喇章京二等叅將爲二等甲喇章京三等叅將爲三等甲

喇章京備禦爲牛叅章京代子爲分得撥什庫章京爲小撥什庫旗長爲壯大屯撥什庫仍爲屯撥什庫凡管理不論官職管固山者卽爲固山額真管梅勒者卽爲梅勒章京管甲喇者卽爲甲喇章京管牛叅者卽爲牛叅章京管擺牙喇額真卽爲擺牙喇額真卽爲擺牙喇章京以瀋陽爲天眷盛京黑圖阿喇城爲天眷興京○廣鹿島副將尚可喜至瀋陽陛見命爲總兵官賜勅曰朕惟任賢使能崇功尚德乃國家之大典乘機違會達變通權誠明哲之芳踪爾副將尚可喜原係明臣知明運之傾危識

時勢之向背。擒明副將二員。取廣鹿附近三島殘破。海防實爲我助。又全携兵民。盡載盔甲器械。乘危涉險航海來歸。偉績豐功。超羣出類。誠可嘉尚。今陞爾爲總兵官。給以勅印。功名富貴。遠期奕世之休。帶礪山河。永無遺棄之義。凡有一切過犯。盡皆原宥。爾宜益勵忠勤。恪共乃職。勿負朕意。欽哉。並授前使者盧可用金玉奎爲甲喇章京。隨可喜歸海州。以孔有德兵爲天祐兵。尚可喜兵爲天助兵。漢軍爲烏真超哈。○逮無治。鄖陽蔣允儀以失陷鄖西諸縣也。

洪承疇進兵岐山。三原賊衆十餘萬。官兵僅三千人。承疇張疑設伏。賊自耀州奔同州。○五月陝西按察司副使賀仁鏡奏。監軍大監孫茂霖玩寇。宣府太監王坤奏言。監軍記功罪耳。追賊有將吏在果。如自鏡言。則地方官之罪。不在茂霖下矣。上不問。

江西大饑。○是月

大清考試漢人生員。取一等十六名。二等三十一名。三等一百八十一名。禮部考取通滿洲蒙古漢人文義者爲舉人。取中滿洲人習滿書者。剛林敦多惠滿洲人習漢書者。察不善恩國泰。漢人習滿書者。宜成格。漢人習漢書者。齊國儒。朱粲然。羅繡錦。梁正大。雷

明紀事本末 卷五 五
與馬國柱金柱王來用蒙古人習蒙古書者俄博特
石岱蘇魯木共十六人並賜爲舉人每人賜衣一襲
免四丁宴於禮部

以大名叅政盧象昇爲都察院右僉都御史代蔣允
儀撫治鄖陽時鄖地殘破數百里無人烟鄖撫所部
兵止五百人餉止六千兩象昇與總督陳奇瑜合兵
連戰烏林關也家溝石泉壩康家坪獅子山太平河
竹木砭箐口諸處共斬賊五千六百餘級又破賊於
峽石斬首及溺死者殆萬人漢南大寇幾盡○五月
丁未

大清兵西行出上榆林口戊申渡遼河○六月乙卯
朔
大清兵次古爾班圖爾哈地方駐營蒙古貝勒各率
所部兵來會

大清太宗諭固山額真阿山等自巴顏朱爾格地方
人龍門口和碩德格類貝勒等進獨石口直探居庸
大貝勒代善等自喀喇俄保地方進得勝堡畧大同
西至黃河俱會兵於朔州先遣人毀邊牆○秋七月
辛卯

大清太宗親率諸軍入尚方堡至宣府右衛遣右衛

叅將書曰滿洲國皇帝致書明國官員予向與諸公
定盟時在我毫無欺誑在諸公亦毫無猜疑故對天
地盟誓以成和好孰意諸公陰懷詭譎不念前盟又
與諸公約遣人尋盟於遼東久候不至予三次遣使
遼東人復拒不納且襲我邊部若謂遼人不和與我
無涉我兩家盟誓仍在若謂遼人既不欲和我等亦
難獨和則不必遣使切望之心從此斷絕諸公或以
向日詐盟自爲得計予縱可欺天可欺乎同盟之人
何論大小今日諸公果願和好可遣信使持爾王璽
書來速與裁決不然予惟量力前行耳夫復何言論

軍民曰予與爾明國構兵非我所願止因遼東官員
欺負難受及上奏又壅蔽不達故奮興師旅冀爾王
下詢其由豈知用兵多年竟無一言相問及予屢次
致書遣人求和並不納我使臣亦不答書前年臨爾
邊地秋毫無犯結盟而歸不意爾官吏陰懷詭詐在
前盟約盡爲爾君臣所毀以理度之汝乃大國當願
太平今予願太平爾乃反是似此干戈皆由爾官吏
壅蔽下情所致爾等父母妻子離散亡身破家皆我
欲和而爾國君臣不肯和之故今日殺傷非予殺之
皆爾國君臣自殺之也○癸巳至宣府東南駐營縱

畧附近居民牲畜財物焚毀廬舍踐傷禾稼乙未畧
保安州一帶西至新城

丁酉遺代王書曰滿洲國皇帝致書代王我國起兵
之故初非有意取天下得大位也我國昔年駐守遼
邊以忠順爲心未動寸草撮土因遼東官員無故傷
害吾祖蹂躪我世傳廬舍田地攘奪我疆土又以我
太祖禮聘葉赫之女偏嫁蒙古復謀害我國偏助葉
赫給兵防守似此種種欺凌遂成七恨後屢次其本
奏聞爾王遼東官不肯上達愈加橫逆欲致於死萬
不得已遂爾起兵實欲爾王察問其由故於取撫順

時盡釋所獲十三省商人詳書七恨付之且囑曰遼東
東官員不爲我轉達爾王爾等當各至本處告爾督
撫轉奏朝廷孰意爾王信遼東官欺誑之言竟無一
次問及以致興兵皆爾王不肯下問之故也王誠憂
國憂民可遣使來我當一一告之想王聞我言亦當
爲我惻然也我若貪財嗜殺蓄心不善何以各國蒙
古盡來歸附我嘗欲和爾國不從故此搆兵若和事
有成安享太平豈有不願之理王以我言爲是來使
宜速

西路兵陷得勝堡盡殺守城兵叅將李全自縊死進

明紀輯略 卷五
攻懷仁

時有監生張文衡到滿洲兵營自言我在大同爲代
府參謀聞大兵四路進邊已知天運有歸成大事者
必在皇上因具奏言臣此來非厭貧賤而圖富貴亦
非因犯罪不得已而來臣審知明國顛危欲獻策相
助奈無可以爲斯民主者惟皇上招賢好士恢弘帝
度肇造丕基先帝時誅罪重典悉改尚寬仁君人之
能事畢矣故爾決意來歸夫明國役煩賦重虐政不
休今大兵四路並入人心願歸者惟視我所行如何
耳不意復行搶掠且不攻宣大而攻小州更失民望

爲今之計乘民心未定備書前後行事之本意布告
四方宣大二總兵官亦宜致書陳說利害以儆其守
若下宣大待以王禮自此進兵愈行仁政則財用愈
足何必專畧民財携歸以致富哉似此遷延時日不
若圖其大者可入倒馬關諸口直抵北京東塞糧道
西絕煤路又於京城東西各安大營以待薊州河南
之兵北京可立困矣遷延日久田野一空城郭完固
欲野戰則不能欲攻城則勞力縱使深入亦難萬全
卽有所得不過貧窮民戶區區小屯有何利益臣今
遠來不獲一見皇上徒賞財物殆非皇上求賢之初

心亦非臣來投之本意也。○庚戌陷保安州畧沿途村堡

上諭部院朕御極之初撤還內鎮舉天下事悉委之大小臣工比多營私罔恤民艱廉謹者又迂疎無通論已巳之冬京都被兵宗社震恐此士大夫負國家也朕不得已用成祖監理之例分遣各鎮監視添設兩部總理雖一時權宜亦欲諸臣自知引罪今經制粗立兵餉稍清諸臣亦應知省其總理監視等官盡行撤回以信朕之初心張彛憲浚漕竣即回監供職惟關寧密邇外境高起潛兼監兩鎮暨內臣提督如

故按崇禎二年四月以內官監太監曹化淳提督南

京織造七月改化淳提督東廠十一月京師戒嚴

以軋清宮太監王應朝監視行營馮元昇覈軍呂直

勞軍十二月以司禮監太監沈良佐提督九門李鳳

翔總督忠勇營提督京營四年九月命太監張彛憲

總理戶工二部錢糧唐文徵提督京營戎政王坤往

宣府劉文忠往太同劉允中往山西各監視兵餉十

月命太監王應朝監關寧軍張國元監薊鎮東協王

之心監中協邵希韶監西協十一月以太監李奇茂

監視陝西茶馬吳直監視登島兵餉五年七月以司

禮監太監曹化淳提督京營十二月以司禮監右少

監劉勞譽提督九門六年五月諭兵部流寇蔓延各
路兵將功罪應有監紀其以太監陳大金監曹文詔
軍閻思印監張應昌軍謝文紀監左良玉軍孫茂霖
監鄧玘軍六月命太監高起潛閱視錦寧張國元監
視山西石塘等路綜核兵餉七月命湖廣守備太監
魏相監視登島兵餉
賊至鳳翔西關言奉督撫檄安插城內守臣知其詐

諭以門不敢啟須縋城上先登三十六人盡斬之總督陳奇瑜借以爲辭劾奏地方官紳撓債撫局上怒命緹騎逮寶雞知縣李嘉彥及鳳翔鄉紳孫鵬等五十餘人下刑部獄○賊混世王等數萬人颺至西安東境欲出潼關老回回先踞南雒山中諸賊聯絡洪承疇率部將張全昌曹變蛟李效祖栢永鎮等共兵三千人趨潼關大峪口賊不得出○總督陳奇瑜困李自成於漢中車廂峽連雨四十日賊馬死者過半弓矢俱脫自成窘面縛乞降奇瑜給免死牌回籍由是縱橫蹂躪遂不可制

八月乙卯諸貝勒率兵往山西畧代州一路左翼兵往畧朔州城東至五臺山右翼兵往畧代州城西陷崞縣王敦堡板鎮堡圓平驛人民皆棄城遁代州陽和兵馬多被殺傷○丙寅滿洲蒙古兵自應州城至大同

太宗立高岡上見總兵曹文詔騎兵立營南門外遣人遺文詔書曰滿洲國皇帝致書於曹大將軍朕觀明國舉動悖亂殊甚在廷諸臣不念將士勞苦不審兵力強弱偏之進戰稍有不前輒行叅劾不日革職則日應死而竟無一審時度勢者由斯以推此番我

軍已入內地將軍能保無罪乎朕非相激之言料將軍慮之審矣又一書遺衆官曰滿洲國皇帝致書於大同宣府陽和和各官察哈爾與我俱邊外之國自相攻擊察哈爾遠遁國人盡來歸我有額爾克楚虎爾多克辛額爾克勞漢塔布囊得爾額爾褚陽塞特爾六人携察哈爾汗之二妻一妹並其部衆從榆林西投入爾地方復有察哈爾部衆半還寧錦半留此地我所攻散之人爾等何爲收納爾蓄之何益此輩終爲我用必無從爾之理盡數察還則已不然我肯輕釋乎○滿洲兵擊敗曹文詔所部騎兵陷靈丘縣殺

知縣守備○代王母楊氏命陽和總督張文衡大同總兵曹文詔等議和時廣寧投降副將鮑承先次子韜在獄中因出之令齋書詣克痘坨大營韜由小路奔哈里莊遇蒙古兵殺韜奪其騾韜復甦有馮國珍者送韜至大貝勒代善營代善令與其父承先相見因韜負傷不遣還卽令馮國珍持書報代王之母書曰爾皇帝黜戮大臣大臣畏懼以致朦蔽下情不能上達母今有意修好誠屬爲國爲民我此番進兵原因下情不通固入內地蹂躪田地擾害人民以昭白我願和不得和之故下民怨恨上天自聞此我進兵

意也已將此言爲書布告各處今母誠能至此和議當速成之勿延時日緩一日則民受一日之害緩旬日則民受旬日之害若和議果成不終日而出境矣○癸酉環大同城下營釋所獲宗室朱乃廷入城索太妃回音乙亥以朱乃廷入城未還亦無報書至將所獲宗室朱乃振與乃廷之妻及其三子俱縱還大同城

丁丑有人爲上諭懸於北樓口滿洲兵獲之其書曰滿洲原繫我屬國今旣叛犯我邊境當此炎天深入必有大禍上天不容或者授首於我也今四下聚兵令首尾不能相救我國人有得罪逃去及陣中被擒欲投歸者不拘漢人滿洲蒙古一體恩養有漢人來歸者照黑雲龍例有滿洲蒙古來歸者照桑噶爾寨例若不來歸非死於吾之刀鎗則死於吾之礮下又不然亦被彼誣而殺之矣

太宗覽畢答書曰滿洲國皇帝致書明國皇帝昨見皇帝書云滿洲原繫屬國此不惟皇帝言之卽予亦未嘗以爲非也皇帝乃天下共主我等原繫屬國因遼東官員欺陵不堪屢次將情具奏又蔽之不通我等思此光景勢必置於死地雖動干戈猶冀來詢其

由孰意皇帝惑於遼東各官欺誑十數年竟無一言
問及以至今日若皇帝早遣人究問兵戈亦早息矣
今皇帝肯遣一信使來詳究事故判白是非欲享太
平何須多時只在旦暮間耳爾國臣僚一味欺妄每
我兵入境自割髮漢人虛報斬級我乃小國若果
每次傷折動及百千兵勢豈能常振皇帝聰明一付
度之欺罔自見斬級之多寡願和之誠僞問黑雲龍
自得其情但黑雲龍惟恐結怨於文武大臣是以不
肯盡告於皇帝也

已卯滿洲兵獲盧登雲稱係曹總兵令往張總督衙

門報捷報稱滿洲兵被我殺傷無數哭聲震天地我
兵未暇取首級止取燧一桿將所獲原書復爲書一
通仍付盧登雲齎去書曰滿洲國皇帝致書於明陽
和總督昨到大同獲曹總兵遣人塘報軍情見滿紙
皆虛誑予素謂明國大邦自有忠臣義士真實幹國
者誰想一旦至此前次得宣府張總兵塘報其虛誑
亦然由此以觀明國之衰已極矣何無一人作忠臣
說實話者予入境來已幾兩月禾稼已盡城池被克
曾無一人對壘敢發一矢者今報中誑言若此豈不
自愧於心乎卽如所云今予尚在爾地曹張二總兵

可聚集各處軍馬。公等高坐城樓觀陣。爾出兵萬。予止以千人應之。出兵千。予止以百人應之。如敢擔當迎戰。猶可捏謊。不然徒以虛言誑君。皇帝不知以爲既能取勝。速宜進戰。爾等又畏懼逃遁。縮頸城中。如此則生民塗炭。何日休息。予一至地方。已知此光景。再來又奈之何。不種不收。民何以食。爾等皆代皇帝子民者。自宜乘我願和。凡有軍情。據實申奏。力贊和好。綏安兆庶。康寧國家可也。爾等只管如此欺君貽害於民。今生受顯禍。來世遭殃孽。何不自畏。予欲對陣之言。非自誇。公等若約期出戰。予當勒兵以俟。

○壬午

大清兵至懷遠。癸未。至左衛城南。

詔發各鎮兵四萬五千。並赴河南。○賊將高傑降於

賀人龍。

陝賊陷靈臺。崇信自水涇州。○陳奇瑜至鳳縣。見賊

氛益熾。北接慶陽。西至鞏昌。西北至邠州。長安西南

至整屋。寶雞衆二十餘萬。始悔爲李自成所愚。

以謝陞爲吏部尚書。唐世濟爲左都御史。○九月以

吳甡爲山西巡撫。○河南賊流入蘄黃。○陝賊分三

部。一由鳳縣攻漢中。一出畧陽。由陽平關入梓潼。劍

州犯蜀一由寧羗犯廣元

閏八月甲申朔

大清兵至左衛城東駐營丙戌遺宣府王太監吳太

監書日爾主任爾等為耳目七月已有旨各還宣府監視太監王坤使

分駐各省爾等理應以兵之強弱民之疾苦及予屢

欲修好之意直奏無隱以奠安爾國之民乃附合外

官專欺爾王國疲民困何時休息且令爾等在外有

何裨益○丁亥陷萬全左衛城殺守備常汝忠庚寅

大清兵由尚方堡出邊所俘人口及獲金銀幣帛驛

馬牲畜無算攻陷州縣衛城破堡城墩臺百餘處宣

大一帶田禾踐為平地盡燒民居督撫邊將皆閉城

自保甚至以土築塞其門無一人敢禦敵者朝廷亦

以中原寇亂不問也○李自成陷真寧殺知縣趙躋

昌○冬十月陝西巡按傅永淳劾奏總督陳奇瑜專

主招撫縱賊流毒○河南賊掃地王趨江北掠英霍

潛山太胡宿松

上以秦賊猖獗逮巡撫練國事以李喬巡撫陝西

十一月總督陳奇瑜革職聽勘○十二月進洪承疇

兵部尚書總督河南山西陝西湖廣保定真定等處

軍務其總督三邊如故

兩廣總督熊文燦令守道洪雲蒸巡道康承祖參將
 夏之木張一傑往謝道山招海賊劉香老被執事聞
 上曰賊渠受撫但當聽其輸誠豈有登舟往撫之理
 弛備長寇尚稱未知督臣節制何事命巡按御史確
 覈以聞尋令戴罪自効○西寧賊盡入河南屯宛洛
 間左良玉軍澠池陳永福鄧玘合軍南陽多有斬獲
 乙亥八年春正月陝西賊數十萬出關分爲三一自
 陝州上平陽入晉一自武關向襄陽入楚一自盧氏
 東向分犯河南北河南北諸賊復分爲三一走伊汝
 陷滎汜東探及鄭州復分道犯商城一自葉蔡南圍

汝寧一自懷慶東渡河掠歸德睢汝陳許等州李自
 成獨留秦中擁衆數萬洪承疇擊敗之退屯興平武
 功突出潼關守將艾萬年等兵皆潰○張獻忠東走
 掠盧鳳安慶

上以祖訓凡郡王子孫有以才能堪任用者宗人府
 具以名聞朝廷考驗授以秩其遷除如常例禮部右
 侍郎陳子壯力言不可上以其沮詔間親下之獄明年

四月始釋已而宗室蒞官多不法公私苦之○河南賊分三道一趨六安

一趨鳳陽一趨潁漢賊陷潁州知州尹夢鰲州判趙
 士寬死之○張獻忠等陷鳳陽焚皇陵樓殿斫松栢

三十萬株殺守陵太監六十餘人縱高墻罪宗百餘人留守朱國手斬賊二十七人而死賊掃地王太平王八府治知府顏容暄囚服匿獄中賊縱囚獲之賊坐堂上杖容暄於堂下杖訖乃殺并殺推官萬文英等六人武官四十一人士民被殺者數萬恣掠三日焚公私邸舍二萬二千六百五十餘間光照百里太監盧九德總兵楊御蕃救至賊趨廬州掠霍山合肥圍六合聚嬰兒百千環薪焚之聽其哀號以爲笑樂攻三日乃去遂陷廬江及無爲州○洪承疇入河南勦賊○江北賊滿天星張大受等西向麻城趨漢口

○二月張獻忠老回回復至秦川○巡按御史吳振纓始以皇陵之變聞上素服避殿親祭告太廟逮總督楊一鵬御史吳振纓下獄一鵬棄市振纓遣戍○以兵部右侍郎朱大典總督漕運兼巡撫廬鳳淮揚移鎮鳳陽○翰林院侍讀倪元璐疏言盜賊恣禍震及祖陵皇上下詔罪已非徒空言也今民間最苦無若催科未敢興言遽停加派請自崇禎七年以前一應逋負悉與蠲免斷自八年督徵有司考成亦少寬之東南雜解如布絹絲綿顏料油漆諸類可改從折色此二者於下誠益於上無損民之脫此猶湯火也

三月斬黃人擒大盜爬天王身長八尺自言天亡我非我罪也其子日啗人心髮目俱赤○樊城騎卒叛殺總兵鄧玘惟步卒未動洪承疇命副將賈一選周繼元分領之

夏四月福建游擊鄭芝龍合粵兵襲劉香老於田尾遠洋香老脇洪雲蒸出船止兵雲蒸先為香老所執雲蒸大呼日吾死耳亟擊勿失遂遇害香老勢蹙投海死康承

祖夏之木張一傑得歸

洪承疇八河南檄總兵曹文詔擣賊於商雒○五月諸賊悉萃於秦○調鄭撫盧象昇巡撫湖廣以前撫

唐暉失事也

六月逮河南巡撫玄默下獄免陝西巡撫李喬官以甘學淵巡撫陝西○總兵官曹文詔擊賊至安羅寨賊大至官軍少力不能支遂自刎死文詔忠勇善鬪前後殺賊萬計為賊所畏及其死也聞者奪氣○秋七月以詹事府少詹事文震孟為禮部左侍郎兼東閣大學士○召廷臣於中左門試時政邊才論

八月以湖廣巡撫盧象昇為右副都御史總理直隸河南山東四川等處軍務統關遼兵巡撫如故朝議既有

總督故設總理以分任之總督洪承疇辦西北總理盧象昇辦東南○冬十月乙巳詔

曰朕以涼德纘承大統不期倚任非人邊乃三入寇則七年師徒暴露黎庶顛墜國帑匱絀而征調未已閭閻凋敝而加派難停中夜思維不勝愧憤本年正月流氛震驚皇陵祖恫民怨罪實在朕今調勁兵留新餉立救元元務在此舉維是行間文武吏士勞苦饑寒深切朕念念其風餐露宿朕不忍安臥深宮念其飲水食麤朕不忍獨享甘旨念其披堅冒險朕不忍獨衣文繡茲十二月三日避居武英殿減膳撤樂非大典禮祇青衣從事與我行間文武吏士甘苦共之俟寇平之日爲止其在廷諸臣各宜省愆惕慮以

回天心救民命○十一月老回回犯南鄧○總理盡象昇擊賊高迎祥於汝州城西斬千二百級是月進象昇兵部右侍郎賜尚方劍便宜行事加督山西陝西軍務解巡撫任以王夢尹代之○十二月大學士何吾騶文震孟罷

秦賊一字王等統衆二十萬撞天王統衆十七萬自潼關入塵埃漲天絡繹百里總兵左良玉祖寬不敢邀擊賊抄掠諸路截燒糧船諸軍乏食○闖王屠光州○張獻忠合江北賊陷巢縣含山和州沿江而下犯江浦○逮庶吉士鄭鄴鄴繼母大學士吳宗達女

弟也宗達揭其杖母蒸妾温體仁入告逮下刑部獄
丙子九年是歲為

大清太宗天聰十年春正月賊闖王闖塌天八大王
搖天動連營攻滁州行太僕寺卿李覺斯知州劉大
鞏悉力固守盧象昇率諸道兵赴援祖寬為前鋒戰
於城東五里橋斬賊一千二百級追奔五十里朱大
典遣副將楊世恩遮賊於定遠斬六百餘級賊自河
池間道出東岡守禦劉光輝以五百人格鬪賊萬眾
並至光輝死之○總兵陳永福敗李自成於朱仙鎮
自成走登封○江北賊紫微星陷懷遠靈壁進偃泗

朝廷有
三大病
根

州○副將祖大樂敗賊於永城斬賊首混天王奪驛
馬盈萬○一字王曹操掃地王連營自歸德趨開封
祖大樂遇之於雪圍誘賊入伏斬首千四百餘級
以劉宗周為工部右侍郎○特簡淮安衛三科武舉
陳啟新為吏科給事中先是啟新伏闕上書其畧曰
朝廷有三大病根以科目取人一病根也據其文章
則言孝弟言仁義及考政事則恣其貪任其酷前所
言者皆紙上空談當其幼學之時父師所教皆謂讀
書可致富貴故進步止知榮身榮親誰更思致君澤
民之道可為痛哭者此也以資格取人一病根也國

初典史馮堅授僉都御史貢士彭友信授布政使秀才曾太授尚書何嘗限資格至嘉靖時猶三途並用今貢士官止於貢舉人官止於舉貢者明知前途無路取如是不取如是母寧多取舉者明知歷任有限清如是貪亦如是母寧貪求若進士則又知天下之爵祿皆其砧几間物天下之士皆其朋比中人煉成一氣打成一片橫行莫之間放誕莫之檢取憑其取與遂其求安得不貪偶有一清廉自愛者則其道其矯共駭其異不去之不已可謂痛哭者此也以知推行取科道一病根也知縣者民之父母倘畏簡書自應謹飭今一選知推不思愛養便行貪酷所以然者良由行取爲科道也彼受任時先以科道自居謂異日能舉劾人榮辱人上司道府亦竟以科道相待謂彼異日可顯我可斥我結交可爲指臂投契可爲與援畏敬之不暇又何敢拂其意制其欲乎故虐民剝民顛倒民陵斃民小民赴愬無路流爲盜賊可爲痛哭者此也國家受此三大病根由是經濟無聞黨羽日盛惟利是好非情不行竟成一迷局舉世盡醉夢於其中而不醒矣嘗見青衿子朝不謀夕一叨鄉薦便無窮舉人及登甲科家貲輒數十萬語云財不在

治病之藥有四

下卽在上使在下也。今日輸賦稅明日輸加派猶有入之之日使在上也。今日發內帑明日發京儲猶有出之之時。今不幸盡入於縉紳之家則何日得其出而流通於世乎。非獨不出也。彼且身無徭產無賦田無糧物無稅又庇護姦民之賦稅徭役其入正未艾也。卽或有時而出非買科第卽買陞遷買員缺出一無不入。百天下有數之財豈能堪此。若病根不除盜賊必不能息。皇上之天下不斷送於章句腐儒之手不止也。臣所以席藁跪伏於正陽門外引領待死上陳治病之藥有四。一當速停科目以黜虛文。一當速

舉孝廉以崇實行。一當速罷知推行取科道以除積年橫恣之陋習。一當速蠲災傷錢糧以蘇積年無告之窮民。由此真才自出風俗還淳而化臻上理矣。灑灑五千餘言皆切時弊。上嘉異之。故有是命。二月唐王聿鍵奏南陽海饑有母烹其女者。○山西大饑

賊過天星合九條龍等入營。西掠蘭河南擾會寧。洪承疇檄左光斗柳紹宗合擊之。賊窮蹙降於陝西。巡撫甘學淵安插所部數萬人於延安。劫掠如故。○盧象昇自葉縣向裕州與李自成戰於十七頂山殲其

精騎殆盡賊遁入山谷阻險自固象昇奏言秦豫楚
大山綿亘千里賊出沒無時若欲窮追何地可歇崇
岡峻嶺深林密箐扳木懸崖日行三四十里馬不能
進人苦登涉此時折色銀無所用本色糧運車牛無
所施勢必以人夫負米隨兵來往一夫負米二斗兵
日食一升人夫自贍一升十日而二斗之糧盡無論
此十日內遇賊勝負以千兵入須千人肩運萬兵入
須萬人肩運卽賊不出而官軍之勢已處其窮矣
撫治鄭陽宋祖舜以遇賊失其符印削籍

大清諸貝勒與朝鮮書曰滿洲國八和碩貝勒十七
固山大臣書奉朝鮮國王我等暨外藩蒙古應天順
時頌揚上德勸進尊號前年具奏弗允今歲新正蒙
古諸貝勒來朝聚集盛京復議勸進故遣使告聞古
人有言天下者非一人之天下惟有德者居之昔明
洪武歸并羣方定號金陵然後北逐大元以成一統
今皇上寬仁厚德博施濟衆國中就治外藩傾心東
漸於海西抵湯古忒北至北海各國歸附承旨嚮風
無背恩義違法令者大軍所指縱橫如意我等仰承
帝命俯順輿情推戴主上欲進尊號王其以爲何如
蒙古四十九貝勒與朝鮮書曰滿洲國外藩諸貝勒

奉書朝鮮國王我等受明朝恩賞已二百餘年矣今非樂爲叛離也因明國官長欺詐賄賂公行蒙蔽君上明國皇帝茫然不知貽禍家邦兼以將懦兵弱內而姦詭盛行外面覆師喪地竊窺天意明之曆數將終矣今滿洲國皇帝仁智兼全施恩布德立心行事動出於正法度號令俱以嚴明兼之將勇兵強所向無敵衆心儆慕天眷有歸是以我等願出死力聽上驅使以待事機之至前年我蒙古入廟勸稱尊號上曰爾等何所見而遽爲此弗允今四十萬衆蒙古太子孔果爾等十六國約昨年十二月內會於盛京同奏皇上宜建尊號以答天人之心今年新正復具奏上曰朝鮮王吾弟也宜令彼知之故我等各國遣使相聞王卽遣親近子弟來此共勸稱尊可也書至朝鮮不受

三月李自成自鄜州至延綏○夏四月以苗胙土撫治鄖陽

降賊過天星復叛於延安陝撫甘學濶削籍聽勘以孫傳廷巡撫陝西○李自成至綏德總兵俞翀霄遇伏被執一軍盡覆米脂延安綏德並陷○武生李進上書請搜括巨室助餉大學士錢士升擬下之法司

上不聽。士升奏曰：李璉倡言縉紳豪右，報名輸官，欲行手實籍沒之法，此皆衰世亂政而敢陳於聖明之前。小人無忌憚，一至於此。且所惡於富者，為其兼并小民耳。若郡邑有富家，亦貧民衣食之源也。以兵荒之故而搜括之，此秦始皇所不行於巴清漢武帝所不行於卜式者也。璉議一倡，亡命無賴之徒相率而與富家為難，禍亂自此始矣。上不悅。士升遂乞罷命。會試二三場兼用五經。放榜後試騎射。○是月五日己卯。

大清大貝勒代善和碩貝勒濟爾哈朗和碩墨勒根代青貝勒多爾袞和碩額爾克楚虎爾貝勒多鐸碩岳託貝勒和碩豪格貝勒阿巴泰貝勒阿濟格勒杜度貝勒超品公楊古里額駙固山額真譚泰六室拜尹圖葉克舒葉臣阿山伊爾登達爾漢阿駙篇古阿革蒙古八固山額真六部大臣等外藩蒙古四十九旗科爾沁國土謝圖濟農等降帥孔有德耿仲明尚可喜等定議上表請受尊號吏部和碩墨勒根代青貝勒多爾袞捧滿字表文科爾沁國土謝圖濟農捧蒙古字表文孔有德捧漢字表文率諸貝勒大臣詣闕跪進

太宗諭曰爾諸貝勒大臣欲朕受尊號前二年已經
屢奏朕恐上不協天心下未孚民志故未允從今復
勸請勉從羣議壬午以祭告天地齋戒禮官奏例用
生太牢祭畢分給各官攜至家熟食之

太宗曰古帝王當未知火食之前行祭天理後世相
因用生太牢祭今恭祀上天之內使至家享之是褻
也可熟薦祭畢卽在神位前分享著爲例十一日乙
酉黎明出德盛門至壇祭告天地畢受寬溫仁聖皇
帝尊號建國

大清改天聰十年爲崇德元年遣官祭告山陵丙戌

請大廟追尊始祖爲澤王高祖爲慶王曾祖爲昌王
祖爲福王族祖禮敦巴圖魯爲武功郡王上

太祖謚曰承天廣運聖德神功肇紀立極仁孝武皇
帝

太后謚曰孝慈昭憲純德貞順成天育聖武皇后

母葉赫納喇氏丙申封大貝勒代善爲和碩兄禮親王濟爾

哈朗貝勒爲和碩鄭親王墨勒根代青貝勒多爾袞

爲和碩睿親王額爾克楚虎爾貝勒多鐸爲和碩豫

親王豪格貝勒爲和碩肅親王岳託貝勒爲和碩成

親王阿濟格貝勒爲多羅武英郡王杜度貝勒爲多

羅安平貝勒阿巴泰貝勒爲多羅饒餘貝勒封外藩
蒙古科爾沁國巴達禮爲和碩土謝圖親王吳克善
爲和碩卓禮克圖親王固倫額駙額哲爲和碩親王
布塔齊爲多羅查薩克圖郡王滿朱習禮爲多羅巴
圖魯郡王奈曼部落衮出斯巴圖魯爲多羅達爾漢
郡王孫杜稜爲多羅杜稜郡王固倫額駙班第爲多
羅郡王孔果爾爲秉圖王封孔有德爲恭順王耿仲
明爲懷順王尚可喜爲智順王其餘陞賞有差定宮
殿名中宮爲清寧宮東宮爲關雎宮西宮爲麟趾宮
次東宮爲衍慶宮次西宮爲永福宮臺東樓爲鳳翔

樓臺西樓爲飛鳳閣正殿爲崇政殿大門爲大清門
東爲東翊門西爲西翊門大殿爲篤恭殿

癸丑詔赦脇從羣盜令有司多方安插○秋七月陝
撫孫傳廷擊賊於蓋屋擒闖王高迎祥獻俘闕下磔
於市○誠意伯劉孔昭奏國子監祭酒倪元璐以妾
冒妻封有旨元璐冠帶閑住

均州宜城穀城上津南漳環山皆賊土人爲嚮導燒
武當太和宮賊衆會集襄陽總理盧象昇發兵討之
大清兵由大安口入京師戒嚴寶坻順義文安永清
雄安肅定興安州定州皆陷進圍昌平巡關御史王

肇坤借總兵官巢丕昌督餉主事王一桂趙悅知州王禹佐等分門拒守有姦人爲內應城陷肇坤身中四矢三刃而死事聞贈大理寺卿子祭葬官其一子

肇坤字亦資蘭谿人崇禎四年進士一桂黃岡舉人督餉昌平以南城最衝身往守俄而西城陷被執不屈死妻妾子女家衆二十七人悉赴井死悅與一桂同官以公事赴昌平遂遇難並贈太僕寺少卿蔭子祭葬而不丕昌

竟率衆以降上以總督薊遼保定軍務丁魁楚不能

禦逮獄戍邊召盧象昇督諸鎮兵入衛○八月十九

日

太清兵出塞○九月朔盧象昇至京時已解嚴遂出

冷口收回難民萬餘人登木葉山而還會宣大總督

梁廷棟卒改象昇總督宣大山西軍務賜尚方劍初

象昇追賊至鄖西聞召入援遂有改督之命時闖王

已誅蝎子塊已爲象昇追逐入秦河南稍寧自羣盜

擾河南北者三年夾河千里雞犬無聲關市盡空荒

村深谷殘黎採草根樹皮以食田隴間亂木枿槎皆

成拱矣虎狼千百爲羣杳非人境賊旣無可掠而象

昇合大軍於中原羅而蹙之羣盜悉入楚疆及是象

昇以關遼之兵北去老回回等盤踞鄖襄間休糧息

馬秋高食足乃合曹操闖塌天諸賊衆二十萬長驅

東下蘄黃六合懷寧望江江浦所在殺掠烽火及於

儀揚餘賊復入河南

以兵部右侍郎王家貞巡撫河南總理直隸川湖山

陝軍務

冬十月起守制楊嗣昌為兵部尚書

八年嗣昌父鶴卒於袁州戌所

九年繼母卒

十一月吏部尚書謝陞罷

上問吏部歷年銓政利弊陞奏對不稱旨遂免官

○下左都御史唐世濟於獄以蒙蔽逆案薦霍維華

邊才也紀華遣戌○十二月鄖撫苗胙士罷以陳良

訓撫治鄖陽

是歲總督朱燦元遣兵討罷金兩江巴香狼壩火烘

五洞叛苗悉平之通上下六衛清平偏鎮四衛道路

凡一千六百餘里設亭障置游徼雲南土官普名聲

作亂燹元討而誅之

丁丑十年春二月江北賊竄大山中應天巡撫張國

維檄左良玉入山搜捕良玉方有舒城六安之捷持

功驕恣不奉調所在焚掠村集為墟詔革良玉職殺

賊自贖○命陝撫孫傳廷兼理河南

會試以大學士張至發孔貞運充考試官取吳貞啓

等三百人

三月廷試賜劉同升陳之遴趙士春等進士及第出

身有差

夏四月新安所千戶楊光先疏攻吏科給事中陳啓
新及首輔温體仁上惡其誣妄予杖戍遼西○撫寧
侯朱國弼奏言温體仁受霍維華賄令唐世濟薦之
上慰諭體仁而奪國弼侯爵世濟亦戍邊○京師大
旱上諭百官修省○閏四月進熊文燦兵部尚書兼
副都御史總理直隸山陝川湖軍務督勦流寇○罷
陳必謙以常道立為河南巡撫○六月大學士温體
仁引疾免賜銀幣遣行人吳本泰護歸體仁非東林
故攻之者眾
然斤斤自守不殖貨
利上始終信任之
秋七月以史可法為右僉都御

史巡撫安廬池太兼理軍務

時以寇亂添設

○八月以薛國

觀為禮部左侍郎兼東閣大學士

冬十月定東宮講官先是左諭德黃道周自陳七不

如謂品行不如劉宗周至性不如倪元璐遠見深慮

不如魏呈潤犯顏敢諫不如詹爾選吳執御老成足

備顧問不如華亭布衣陳繼儒龍谿舉人張爨朴心

醇行不如纍臣李如燦傅朝佑文章意氣不如錢謙

益鄭鄮有旨責其顛倒是非鄭鄮滅倫杖母猶曰不

如是何肺腸道周疏辨復營護鄮嚴旨切責至是項

煜楊廷麟請以講官讓道周閣臣張至發因道周有

不如鄭鄖語。謂其意見偏。不可以輔導。元良事遂寢。李自成過天星。陷寧羗。分三道入西川。自成由七盤關度朝天閣。至廣元。陷昭化。劍川。梓潼。離雅。汶川。漳明。監亭。諸縣。圍綿州。漸逼成都。巡撫王維章次保寧。懼賊不敢出。賊焚郫縣。詔革維章職。以傅宗龍巡撫四川。○十二月。吏部尚書姜逢元。兵部尚書王業浩。並罷。以考選多濫也。

是歲水西安位死。無嗣。族人爭立。朝議郡縣其地。總督朱燮元上疏諫止。傳檄土目。諭以朝廷威德。諸部爭納土獻重器。燮元召將吏議。以爲衆建土司。使其勢小力分。則易制。各欲保土地。傳子孫。則不敢爲逆。乃上疏曰。臣按西南之境。皆荒服也。楊氏反。播奢氏反。蘭安氏反。水西而滇之。定番。彈丸小州。爲長官司者十有七。二三百。年未聞有反者。非他司好逆。定番獨忠順也。蓋地大者。跋扈之資。而勢弱者。保世之策也。臣分水西之壤。授諸渠長。及有功漢人。咸俾世守其俗。虐政苛斂。一切除之。使參用漢法。可爲長久計。上允所請。西南遂底定焉。

戊寅十一年春正月。裁南京冗官八十九員。○二月。改河南巡按御史張任學爲都督僉事。總兵官鎮守

河南任學凱得巡撫且欲薦故丹徒知縣張放因疏 詆諸總兵不足恃盛稱文吏有奇才可禦寇上 竟以總兵授之 ○丙午上御經筵畢庶子黃景昉言 在學大沮悔

鄭三俊為刑部尚書敝衣一篋爨烟不給止以擬獄 輕得罪請宥之上曰三俊雖清何濟會應天府丞徐

石麒疏稱三俊清節得放還 ○總兵左良玉陳洪範

大破賊於鄖西張獻忠降於洪範 初獻忠貧時為小 盜洪範獲而釋之

以是懷舊恩乞降於洪範總理熊文燦承制撫之為 請於朝詔貸其罪立功自贖獻忠率部曲數千人居 於沙界山自言能制鄖襄荆承數百里內外無一賊 文燦曲徇其請遂驕不奉法屢徵從征不應又求襄 陽一時以市其軍文燦議給二萬人餉獻忠乞給十 萬人餉文燦依回未許獻忠聲言寄家口於穀城入 據守之分屯 陝賊聚川西為洪承疇所殲李自成子 羣盜於四郊

身入楚依張獻忠獻忠將殺之自成獨乘驟日行六

百里走浙川老回回營 自成在浙川卧病半年老回 回資以數百騎仍出剽掠

○三月上御左順門召考選諸臣問兵食計知縣曾

就義對曰百姓困苦皆由吏之不廉使守令皆廉即

稍從加派以濟軍需未為不可上拔第一 ○夏五月

宣大總督盧象昇丁父艱詔起陳新甲代之令象昇

縗服從事候代以三品考滿進象昇兵部尚書 ○六

月逮湖撫余應桂以方孔炤為湖廣巡撫 ○以楊嗣

昌為禮部尚書兼東閣大學士仍領兵部事 ○秋八

月曹操會過天星托天王整齊王小秦王混世王整

十萬革里眼射塌天諸賊於陝州由內鄉浙川犯襄陽熊文燦遣副將龍在田擊之斬首六千級奪其騾馬萬匹諸賊四散曹操獨留浙川山中守險自保○

九月

大清兵薄墻子嶺總督吳阿衡拒守五日城陷阿衡及中軍副將魯宗文被執不屈斷膝及腰而死阿衡裕川

人萬曆四十七年進士弘光時謚忠毅

大清兵入密雲兵部檄宣大山西總兵楊國柱王樸虎大威八援總督盧象昇立遣三帥入居庸趨都城陳新甲亦至受勅印交代象昇入勤王中途聞詔仍

賜尚方劍總督天下援軍

召孫傳廷洪承疇入衛○冬十月四日盧象昇陛見

上慰勞之咨以方畧對曰臣意主戰上曰朝廷原未

言撫對曰兵部以兩階干羽為言上曰此與三苗負

固不同卿可赴兵部總監議賜饌而出時楊嗣昌以

奪情為兵部尚書與總監內官陳起潛密主和議又

嗣昌見起潛坐必居下象昇奉旨往議徑坐其上兩

人不悅象昇問戰守之事並默然象昇出即陛辭夜

半抵昌平上遣官齎白金三萬兩銀牌三千面綵幣

五千段犒軍賜象昇御馬百匹大僕馬千匹而起潛

多方阻撓。象昇憤疏請分兵。嗣昌以楊國柱等三帥屬象昇。關寧諸路兵屬起潛。象昇雖名督天下兵。實不滿二萬人。陳新甲至昌平。象昇分兵與之。復還京師。列營安定。德勝東直西直門外。

大清兵自順義西向抵京城。戰旬日。始解去。攻良鄉涿州。象昇應援却之。○孫傳廷洪承疇合兵五萬八衛。曹操聞之。以為勦已也。突走均州。叩太和山。提督大監李維政乞撫。維政言於文燦。文燦許之。奏請貸其死。授游擊將軍。曹操即羅汝才也。汝才就撫。分屯言不為官。不食糧。願為百姓耕田。此中而已。諭其解散。部眾不聽。與鄖均諸民錯壤而居。時張獻忠就撫。

屯穀城汝才遙與為聲援

大清兵分三路。一由涑水攻易州。一由新城攻雄縣。一由定興攻安肅。○十一月盧象昇戰於慶都有斬獲。遂抵真定。巡撫張其平閉城不納。軍士饑甚。象昇激以忠義。人皆無怨。

大清兵攻高陽。前太傅中極殿大學士兵部尚書孫承宗拒守。城陷死之。年七十六。子鈐。鈐鑰。鑄。孫之沉之。湧之。灝之。浩之。濠皆力戰死。承宗字稚繩。高陽人。萬曆三十二年

進士弘光時謚文忠

十二月大學士劉宇亮出視師。奏象昇所屬多失守。

詔奪尚書職銜。以侍郎督軍。俄聞山西大同告警。楊嗣昌欲令象昇往救。議未定。總兵王樸遽引兵去。時將士饑。又奉詔不許近城。皆露處野外。象昇進軍。鉅鹿陳起潛擁關寧兵相鉅五十里。檄援不應。象昇孤軍。援餉皆絕。自分必死。行至蒿水橋。遇

大清兵象昇將中軍。虎大威將左。楊國柱將右。大戰。移時收兵。夜半被圍。明日騎益至。圍之三重。象昇等力戰。自辰至未。矢盡。火藥竭。大威請潰圍。出不許。象昇身中四矢三刃。猶手殺數十人而死。大威國柱得脫。全軍皆沒。事聞。嗣昌不信。有小校俞振龍者述象

昇死狀甚悉。且言其忠勇。嗣昌怒。捶死之。象昇字建

天啓二年進士。死時年二十九。象昇通曉兵法。有勇力。善騎射。精刃槩。諸將無與比者。陣沒後。卹典不及。明年其妻王氏請卹。又明年其弟象雲亦請。俱不報。及嗣昌敗。乃贈太子少師。兵部尚書。賜祭葬。廕一子。錦衣衛世襲千戶。弘光時。追謚忠烈。其弟象觀。崇禎十六年進士。亦死國難。

○以丁啓睿為陝西巡撫。改洪承疇薊遼總督。孫傳廷保定總督。

加傳廷兵部右侍郎。賜上方劍。督諸鎮援軍。時京畿殘破。內監握重兵。不救。戰士饑疲。將吏解體。

大清兵無所顧慮。直下山東。

已卯十二年春正月初二日

大清兵破濟南。德王被執。州縣多望風潰。詔逮山東

巡撫顏繼祖下獄論死

繼祖於本年八月棄市。崇禎朝巡撫被誅者十一人。薊鎮

王應豸以剋餉死。山西耿如杞以兵變死。宣府李養冲以侵漁死。登萊孫元化以陷城死。繼祖及大同張翼明。陳祖苞。保定張其平。四川邵捷春。永平馬成名。順天潘永圖並以失事死。

大清兵破靈壽原任延綏巡撫在籍馬從聘語其三

子曰吾大臣義不可辱汝曹生無害也遂自縊三子

卒從死焉

從聘字起莘萬曆十七年進士死時年八十二贈兵部尚書謚介愍

○以李

仙風為河南巡撫削前撫常道立籍以其縱賊渡河

也○二月

大清兵北旋○三月逮河南總兵張在學○左良玉

大敗河南賊於內鄉○夏四月耶撫戴東旻免以王

鰲永撫治鄖陽

六月張獻忠殺穀城知縣阮之鈿以叛羅汝才九營

並起應之焚穀城西走熊文燦檄左良玉追賊至房

縣賊設伏羅喉山良玉兵度隘入伏中一軍盡沒失

其符印事聞文燦良玉俱革職殺賊自贖○秋八月

壬戌命大學士楊嗣昌督師討賊賜尚方劍

磔故庶吉士鄭鄖於市○九月丁卯嗣昌陛辭宴於

平臺後殿上手觴嗣昌三爵賜詩一章○冬十月楊

嗣昌至襄陽入熊文燦軍詔逮文燦入京論死棄西

市○拜左良玉為平賊將軍從楊嗣昌之請也○老

回回革里眼左金王合二萬人分屯英霍潛太諸山
遼將黃得功川將杜先春屢殺賊賊避其鋒

是歲兩京河南山東山西大旱

庚辰十三年春正月逮湖撫方孔照以宋一鶴為湖
廣巡撫○楊嗣昌奏辟永州推官萬元吉為軍前監
紀從之

二月會試以大學士薛國觀蔡國用充考試官取楊
瓊芳等三百人○平賊將軍左良王大破張獻忠於
太平縣之瑪瑙山斬首萬餘級獻忠精銳俱盡止千
餘騎自隨由鹽井竄與房界上良玉屯興安平利諸

山連營百里圍而不攻賊伏深箐中山氓市鹽及芻
豆於賊為賊耳目獻忠因得收散亡走白羊山不知
所往

三月廷試賜魏藻德葛世振高爾儼等進士及第出
身有差

楊嗣昌次荆門立大勦營以副將猛如虎領之○夏
四月詔考選大典須科貢兼舉以收人才之用○江

西巡撫解學龍薦舉布政司都事黃道周

道周前官少詹事降

級上以道周黨邪亂政學龍濫舉俱逮至削籍廷杖
八十刑部尚書李覺斯擬罪輕嚴旨切責再擬烟瘴

充軍。上以為失出，除覺斯名，移鎮撫司掠治。仍還刑部獄。明年十月尚書劉澤深仍以謫戍請，乃戍廣西。德璟周延儒黃景昉陳演吳牲相繼。上從容顧問，於是蔣為請，遂傳旨復官及還朝，以疾乞歸。○**鄖撫王鰲**承

罷以袁繼成撫治**鄖陽**。

五月羅汝才過天星陷**大昌**，犯**夔州**，**石砬**女帥**秦良**

玉來援，與督師監紀萬元吉合軍扼夔門，將軍左良

玉川撫邵捷春俱會，時總兵鄭嘉棟副將羅于莘張

應元汪雲鳳賀人龍李國奇等四面蹙賊，斬賊首東

山虎擒賊將自來虎副場天一捍鎗掠山虎劉金鍾

金狗兒滾地狼等一百四十九人，前後共斬賊七千

九百餘級，顛墜蹂躪死者徧山谷，獲甲仗馬騾無數

於是托天王即常國安降於張應元，高守達亦來奔。二人為官

軍前鋒殺賊最多小秦王金翅鵬降於楊嗣昌，整十萬過天

星即惠登相清澗人掃地王即張一川皆降，時張獻忠遁巴巫間

汝才與之合謀渡河西走。○六月大學士薛國觀罷

秋九月楊嗣昌屯**巫山**，賊首關索來降。○**秦**師破賊

於**函谷**，斬蝎子塊。○冬十月降將掃地王擊張獻忠

於梓潼，陷陣被執，不屈死之。○十一月進**陝**，撫丁啓

睿總督**陝西**、**三邊**、**山西**、**河南**軍務。

十二月李自成陷**永寧**，殺**萬安**王采鑿音慶，連破四十

李公子賢

八寨羣盜響應衆至數十萬謀主李巖勸自成賑濟饑民故所至多歸之河南久旱杞縣舉人李信前兵部尚書李精白之子也性倜儻

在俠嘗出家粟數千石賑荒鄉人德之稱李公子賢精白魏黨杞士大夫羞與為伍公子請於督撫願從軍殺賊士大夫懼其報復誣公子通賊捕送獄杞民殺令破械出之往投自成深見禮重更名巖授將軍又盧氏舉人牛金星以磨勘被黜因醫生尚綱見自成遂參謀議聘其女為妻自成所至屠戮李巖勸其拊循百姓以收人心由是自成不妄殺且以先所掠財物散饑民民皆稱李公子仁義兵傳聞者以為自成不知其為李巖也

是歲兩京山東河南山西陝西浙江大旱蝗至冬大饑人相食

辛巳十四年春正月李自成圍河南府以大砲環攻

城城守嚴不動總兵王紹禹所部兵叛執副使王胤

昌殺守陴者呼於城上賊登城福王及世子縋城走

士民被破畧盡賊跡王在迎恩寺執之并執前兵部

尚書呂維祺賊踞王宮殺王取其血雜鹿肉飲酒曰

此福祿酒也維祺罵賊死王妃鄒氏及世子遁出奔

懷慶賊取宮中珠玉金帛焚王宮盡發府庫倉廩大

賑饑民事聞逮總兵王紹禹誅之籍其家○二月李

自成圍開封府府城金完顏亮增築厚數丈甚堅賊

用洞車陣壯士環城鑿穴巡按高名衡固守周王恭

枵出五十萬金市米麥餉守陴者募能擊死一賊予

五十金。兵民踴躍共擊賊。凡七晝夜。賊乃退。詔逮巡撫李仙風。仙風自縊死。以高名銜巡撫河南。○自陷歸德。圍左良玉於鄆城。聞秦督汪喬年出關。即解圍迎戰。喬年嘗發自成祖墓。襄城五日。城陷。喬年自殺。守將李萬慶死之。即降人射塌天也。自成得秦兵數萬人馬二萬匹。遂陷南陽。殺唐王世子。走楚總兵。猛如虎死之。

張獻忠自巫山而下。將趨房竹。鄆撫袁繼咸悉兵拒守。獻忠知襄陽無備。自率輕騎一日馳三百里。先遣雷興秀等下宜城。殺督師軍使。取其符驗。夜叩襄陽。

城門守者驗符。啓關。道臣張克儉納之。處其人於承天寺。夜半承天寺火。襄王府門亦火。賊盡入城。知府王承曾遁。道臣張克儉推官酈曰廣死之。獻忠入襄王府。坐殿上。坐王堂下。勸以卮酒。曰吾欲斷楊嗣昌頭。嗣昌遠在蜀。今當借王頭。使嗣昌以陷藩伏法。王其努力盡此一杯酒。因殺王。焚其宮。投屍火中。福清王常澄逃免。殺貴陽王常法。發銀十五萬兩賑饑民。左良玉蓄貲於襄陽。盡為賊有。○三月山東賊熾。革巡撫王國寶職。命楊御蕃劉澤清合軍剿曹濮賊。督師楊嗣昌以兩親藩遇害。憂憤不食。卒於沙市。嗣昌

武陵人。字文弱。萬曆三十八年進士。父鶴字修齡。萬曆三十二年進士。崇禎二年以兵部右侍郎代武之望總督陝西三邊軍務。巡按御史吳姓劾鶴主撫誤國。逮下獄。遣戍袁州。嗣昌初舉進士。乃祖謂其年少不宜牧民。就杭州府教授。官至兵部尚書。改禮部兼東閣大學士。十二年九月督師討賊。十四年三月朔卒於軍。年五十四。鄖撫袁繼咸河撫高名衡皆以嗣昌自盡。聞其子以病卒。報莫能辨也。上為傷悼。諭曰：輔臣嗣昌二載勤勞一朝畢命。然功不償過。罪實難辭。其議罪以聞。定國公徐允楨等請用失陷城寨律斬已死存案。上曰：嗣昌功雖未成。盡悴可憫。其賜祭有司。設柩還籍。嗣昌先以勦賊功進階太子少傅。既卒。諭臨監平賊功。加贈太子太傅。

左良玉革職戴罪圖功。逮鄖撫袁繼咸。○夏四月山東寇盛。詔設徐臨通津四鎮以護漕。○河南土寇袁時中率眾二十萬趨鳳泗。總兵劉良佐奮擊之。逐北

二百里。死者過半。餘皆潰散。時中遁去。○羅汝才等

陷隨州。知州徐世淳死之。屠其民。血流有聲。

五月釋前兵部尚書傅宗龍於獄。十二年十二月以奉對忤旨下吏。

命為兵部右侍郎兼都察院右僉都御史。代丁啓睿

總督陝西三邊軍務。專討李自成。○召前大學士周

延儒。張至發賀逢聖入朝。至發不赴。逢聖引疾歸。延儒復相。吳時昌力也。○

秋七月羅汝才合於李自成。○八月左良玉擊張獻

忠於信陽。奪其馬萬餘匹。降其眾數萬人。獻忠中流

矢。乘夜東奔。部曲離散。僅以數十人自隨。○賜前大

學士薛國觀死。按崇禎十二年六月選各部主事吳昌時已擬吏部上手定先後示不測。

昌時得禮部以為國觀抑之。大恨。上嘗召國觀語及朝士貪汙。對曰使厥衛得人。朝士何敢黷貨。時東廠大監王化民在測汗出浹背。於是專伺其短。刑科袁愷乘隙劾奏。國觀納賄有據。辭連吏部尚書傅永淳。侍郎蔡奕琛等俱下鎮撫司訊。國觀削籍。入京聽勘。并下左副都御史葉有聲於獄。國觀奏辨不聽。尋賜死。殺中書舍人王陞彥以其通賄國觀也。事發於東廠。而昌時實陷之。○九月張獻忠

因羅汝才奔李自成。自成不納。汝才資以騎兵五百。獻忠出商城奔英山。○傅宗龍會保定總督楊文密率兵渡河討賊。敗於孟家莊。諸將賀人龍李國奇皆奔。文岳亦避去。宗龍慨然曰。吾當死久矣。今日陷賊中。不能效他人走也。乃集所部六千人掘塹築壘。以檄台國奇人龍來援。二人不至。自成穿兩濠困之。

糧盡突圍出。將至項城。宗龍被執。賊誑稱宗龍兵誘開城門。宗龍大呼曰。此賊也。我兵敗被執。門不可開。速用砲擊賊。勿顧我。賊攢刀殺之。賊亦退。事聞。復官兵部尚書加太子少保。予祭葬。蔭一子。宗龍字仲綸雲南昆明人

萬曆三十八年進士

冬十二月李自成陷禹州。殺徽王。再圍開封。周王貯金城上。擒一賊者。予百金。斬一首者。予五十金。戰沒者。卹其家五十金。傷者。輕重有差。賊每攻城。責甲士各取一磚。有磚者歸營。無磚者斬。取磚成穴。躡足可登。總兵陳永福力鬪射自成。中其左目。殺賊將上天

龍等。賊攻不克。又於城壞處貯火藥。火震巽裂。當其衝者無不糜爛。名曰大小放。已而火作。內土堅外土浮。火反外擊。殲賊數千騎。乃解圍。屯朱仙鎮。遣賊攻南陽郡邑。鄧州知州劉振世死之。內鄉鎮平唐縣新野皆降。○上諭朱大典受命勦賊。全無一効。其革職聽勘。以高斗光提督鳳陽兼督皖楚豫兵會勦。是歲兩京山東河南浙江大旱蝗。

壬午十五年春正月起。孫傅廷爲兵部右侍郎督陝西兵勦賊。○二月

大清兵破錦州。遼東巡撫丘民仰被執不屈死之。先是錦州圍急。民仰與總督洪承疇進至松山。爲聲援。諸將王樸等軍大潰。民仰承疇入守錦州城。誓以同死。至是遇害。事聞。贈右都御史。賜祭六壇。官爲營葬。錄其一子。建祠都城外。與承疇並祠。上將親臨致祭。聞承疇尚存。乃止。○三月李自成復圍開封。別遣賊陷陳州。副使關永保鄉紳崔必之王受爵等力戰死。州城被屠。

夏四月張獻忠陷舒城。邑紳胡守恆拒戰死之。賊改舒城爲得勝州。○孫傅廷援勦河南總兵賀人龍。以師來會。傅廷疑人龍與賊同鄉。斬之。人龍初以諸生

効用屢立戰功總全陝兵驍寇劇賊多歸之往往得其死力既被殺羣賊酌酒相慶曰賀風子死取關中如拾芥耳或云上密勅傳廷殺之自成在開封與羅汝才約圍而不攻

五月起鄭三俊為刑部尚書○張獻忠陷廬州知府

鄭履祥死之○起馬士英為兵部左侍郎兼右僉都

御史提督鳳陽士英初撫宣大坐廢至是阮大成為營救起用○六月以蔣

德璟黃景昉吳牲並東閣大學士

吏部尚書李日宣戍邊以枚卜濫舉房可壯張三謨

宋攻也

秋七月詔援開封山西總兵許定國潰於覃懷兵部

侍郎侯恂所督諸軍潰於河上督師下啓睿保督楊

文岳總兵左良玉虎大威楊德政方國安諸軍不戰

自潰賊追奔四百里啓睿失勅書印劔事聞啓睿下

獄文岳革職聽勘○八月改鄭三俊為吏部尚書范

景文為刑部尚書進劉宗周左都御史○開封圍久

人相食山東總兵劉澤清來援聞諸軍潰即引去汴

人議鑿朱家口以灌賊賊遂決馬家口以灌城巡撫

高名衡總兵陳永福乘小舟至城上周王府第已沒

王居西城樓督師侯恂以舟迎王總兵卜從善率水

師至城上。推官黃澍從王乘城夜渡。達隄口。賊乘高據筏發矢石擊汴人之北渡者。時城中百萬生靈盡溺死。城上尚有數萬人。賊浮舟掠之去。○孫傳廷至南陽。牛成虎將前軍。左勦將左軍。鄭嘉棟將右軍。高傑將中軍。羅汝才李自成迎擊之。諸軍大潰。賊陷歸德。推官王世琰死之。○九月黃得功大破張獻忠於潛山。殺賊萬餘人。奪騾馬數萬。○誅兵部尚書陳新甲。先是周延儒奏曰。國法大司馬兵不臨城不斬。上曰。他邊疆卽勿論。僂辱我親藩。豈不甚於薄城乎。遂誅之。○冬十月

大清兵從墻子嶺入薊州。○十一月以原任添設密雲巡撫趙光忭爲兵部右侍郎兼右僉都御史。總督薊州永平山海通州天津諸鎮軍務。時

大清兵克薊州河間獻縣交河衡水景州等處。四出攻掠。援軍觀望不敢前。總督趙光忭范志完皆不敢言戰。任其蹂躪。○劉良佐大破張獻忠於安慶。獲馬五千餘匹。奪回難民萬餘口。賊走蘄水。○李自成屠南陽。○閏十一月

大清分兵南下。○李自成陷汝寧。知府傅汝爲赴水死。執前保定總督楊文岳道臣王世琮通判朱如寶

副將賈慄參將馮名聖皆罵賊不屈賊縛諸人於三里舖發大砲擊之碎其屍汝陽知縣文師頤亦死之士民被屠者數萬人公私廬舍盡燬崇王由橫避至襄陽亦遇害○御史湯若橋舉西洋人湯若望演習火器

禮科給事中楊垓行人右司副熊開元以言事下獄

劉宗周爭之削籍吏部尚書鄭三俊刑部尚書徐石

麒疏救不聽

明年開元釋獄垓戍邊

○十二月河南巡撫高名

衡免以巡按御史王漢代之○李自成羅汝才至襄

陽襄人焚香以迎左良玉擁衆二十萬避賊而南賊

進徧荊州惠王走湘潭自成至荊州荆人開城迎之

左良玉避賊由漢口出屯武昌之金沙洲

大清兵圍兗州吏科左給事中范淑泰典浙江鄉試

事竣還家在圍城中竭力拒守城陷死之詔贈太僕

寺少卿官其一子

淑泰字通也滋陽人崇禎元年進士

○李自成陷德

安湖廣巡撫宋一鶴以賊近獻陵近赴承天設防賊

已犯陵陵軍柵木爲城從內射賊賊縱火焚柵遂燬

享殿進攻承天○是歲兩京山東河南浙江大旱蝗

癸未十六年春正月李自成陷承天巡撫宋一鶴總

兵官錢中選畱守沈壽崇皆死之獲鍾祥知縣蕭漢

賢令也自成戒其部衆曰殺賢令者死無赦居之寺

中戒諸僧曰令若死屠爾寺僧護守之漢曰吾盡吾

道不礙汝法遂自縊一鶴宛平人崇禎三年舉人承壽崇宣城人崇禎元年武舉

天既陷總兵方國安等退屯漢口左良玉退屯蕪湖

御史李振聲守顯陵降於賊自以為與賊同姓肩輿

出入賊營揚揚得志自成自稱奉天倡義文武大元

帥羅汝才自稱代天撫民德威大將軍改承天府為

揚武州○張獻忠屠蘄州殺守道許文岐河南總兵

劉超反於永城巡撫王漢率師至其地聲言招撫邑

紳丁魁楚練國事等開北門納之諸軍已入漢亦單

騎馳入大呼勿殺百姓天忽雨軍稍却賊乘勢格鬪

漢遂遇害叅將陳治邦游擊連光耀父子皆戰死游

擊馬魁復突戰入城負漢屍而出面如生河南北士

民間之莫不泣下王漢字子房掖縣人崇禎十年進士有膽決負氣敢任見人有一長

輒握手稱嘆不容口有陳民間利弊及規其過失者則悚然下拜在行間與士卒同甘苦得其死力善用

間謀賊中動靜必預知嘗令河內間巨寇劉二謀以

正月三日犯濟源漢出其不意以除夕發兵元旦登

天壇山山陡絕用布牽挽始得上漢持刀在前行衆

鼓勇從之奪其山擒二以歸又乘大雪突至山西擒

妖僧智善夜半渡河破賊楊六郎威名遠振李自成

圍開封外援不至漢率親兵馳赴金龍口柳林諸處
燃火為疑兵令死士入賊中聲言宣大及左良玉兵
數十萬至矣賊聞之驚圍稍寬上官交薦以知縣行
取至京莊烈帝名見德政殿奏對稱旨立授御史監
左良玉軍至潼關即命巡按河南遂入開封追賊朱

仙鎮連戰皆捷未數月即為巡撫至是遇害事聞上痛悼贈兵部尚書蔭一子錦衣衛世襲百戶命有司建祠致祭未幾賊起被擒伏誅傳首九邊

二月會試以大學士陳演魏藻德充考試官取陳名

夏等四百人○李自成陷郟縣知縣李貞死之○誅

順天巡撫潘永圖永平巡撫馬成名以失陷地方也

○三月廷試賜楊廷鑑宋之繩陳名夏等進士及第

出身有差○時山東州縣大半殘破

大清兵直抵海州贛榆沐陽豐縣等處所至皆下

夏四月

大清兵北旋趙光忭合唐通白廣恩等八鎮兵邀之

於螺山敗績上命首輔周延儒督師斷其歸路亦無

功而還

李自成殺革里眼即賊賀人龍左金王即賊簡養成○張獻忠

屠蕪水陷黃州殺副使樊維城○河南道御史祁彪

佳劾奏吏部文選司主事吳昌時紊制弄權每年外轉科一

道二昌時改為科四道六○李自成殺羅汝才即賊曹操其眾潰散○

五月上名保定巡撫徐標本年二月標以淮徐道擢保撫問畿民困

苦狀對曰臣自江淮來見城郭已陷者因蕩然一空

即未陷者亦止餘四壁到處蒿萊滿目雞犬無聲曾

未遇一耕者皇上土地人民幾盡何以圖治上悚然

因歔歔泣下。標言今日須重邊防。中國以邊疆爲門戶。門戶固。堂奧自安。嚴飭邊臣。令先時修備。有疎玩者。法無赦。於其重懲於失事之後。孰若嚴毖於未事之先。欲修內治。在擇守令。守令賢。則政清刑簡。盜自息。民自安。上曰。諸臣不實心任事。以至於此。皆朕之過也。標又言。遇敵騎。須用車。方能遏其馳突。此有足之城。不餉之馬。進可戰。退可守。兵食不足。在招撫流民。墾荒土。此與屯田法異。止就在冊之民。征租之地。招集開墾。臣所部士卒。簡其强者戰。次者守。下者耕。給與牛種。不憂兵食矣。上嘉納之。○秦督孫傳廷出

潼關。李自成。大營移苑。向洛。

張獻忠陷漢陽。渡江攻武昌。楚府新兵開保安文昌

二門納賊。

先是賊詐爲承天德安潰兵。過武昌。楚土名募之。號楚府兵。隸長史徐學顏麾下。

叅將崔文榮力戰死之前。大學士賀逢聖合門殉難。

沉楚王於江。城中士民數十萬。以騎兵夾道。悉自漢

陽門驅入江中。浮屍蔽江而下。獻忠居楚王宮。改武

昌府爲天授府。鑄西王之寶。開科取士。

鄉試取中七十八人。殿試

進士三十人。皆授州縣官。

○吏部尚書鄭三俊以薦吳昌時引咎

罷。大學士周延儒放歸。

進翰林院。修撰魏藻德爲禮部右侍郎兼東閣大學

士○以史可法為南京兵部尚書○秋七月上訊吳昌時於中左門拷掠至折脛乃止徵周延儒聽勘先是給事中郝綱劾奏吏部郎中吳昌時禮部郎中周仲璉竊權附勢納賄行私內閣機密每事宣泄總之延儒天下之罪人昌時仲璉又延儒之罪人也山東兵備僉事雷演祚召見為上言周延儒招權納賄凡考選科道求總兵巡撫必先通幕客董廷獻然後得之上始疑延儒放歸復徵聽勘

陝兵至河南知賊家口多在唐縣入城盡殺之會大雨連旬官軍乏食皆西走賊大隊來追一日馳四百

里及於孟津官軍死者四萬人孫傳廷回屯潼關○八月總兵常安國等會師於武昌賊西走陷岳州殺所掠婦女沉其舟陸行至長沙沉撫李乾德奉吉王惠王奔衡州長沙陷總兵尹先民何一德降賊推官蔡道憲死之衡州陷桂王吉王惠王奔永州○九月巡按湖南御史劉熙祚遣兵護王入廣西而自入永州死守城陷死之寶慶常德並陷故督師輔臣楊嗣昌武陵人獻忠發其獻忠遣賊分陷江西之袁州吉安改吉安為新安府盧陵為順民縣建昌撫州廣東之南雄韶州廣西之桂林潯州城邑皆空

詔加左良玉少師移鎮武昌○冬十月李自成攻潼

關白廣恩戰敗高傑擁兵不救關城陷孫傳廷大呼

躍馬揮刀衝入賊陣而死

傳廷字伯雅山西振武衛人萬曆四十七年進士崇

禎十六年五月以兵部尚書督河南四川山西湖廣

貴州江南江北軍務十月十六日潼關失守高傑奔

延安白廣恩奔固原傳廷突陣遇害年五十一後賊

數日西安陷夫人張氏率三妾二女並赴井死

陷渭南知縣楊暄死之屠其城陷華州商州商雒道

黃世清死之屠其城陷臨潼進逼西安陝撫馮師孔

督兵拒守有參將王根子內應城陷師孔及按察使

黃綱長安知縣吳從義指揮崔爾達秦府長史章世

炯在籍戶部尚書焦源溥磁州副使祝萬齡禮部主

事南居業宣撫焦源清叅政田時震御史王道純舉

人席增光朱誼泉山東僉事王徵都司吏丘從周皆

死之總兵白廣恩降郡屬盡陷蒲城知縣朱一統投

井死自成在西安放兵大掠三日乃下令不得妄殺

一人違者將吏償命改西安府為長安府據秦府為

宮授秦王存樞權將軍世子妃劉氏曰國破家亡願

求一死自成遣歸母家○先是賊屢陷名城大吏未

有降者至是西安布政使陸之祺平湖人詣賊降賊喜

用為戶政府尚書有宋企郊者乾州人由進士歷官

吏部員外郎家居首出降賊用為吏政府尚書有鞏

月已詳略

煇者真寧人。由進士歷官河南提學僉事。罷歸降賊。用爲禮政府侍郎。有楊建烈者韓城人。由進士歷官通政使。除名降賊。用爲戶政府侍郎。有張國紳者。素無行。首請自成稱帝。號冀爲宰相。誘故太僕文翔鳳。妻鄧氏以獻。鄧知書工詩。以爲自成必幸。自成責之曰。汝與太僕同輩。不能庇其妻子。乃以媚我。真狗彘也。卽斬國紳。禮鄧而歸之。自成性淡薄。衣布衣。食無兼味。一妻一妾。不蓄媵婢。

無子。以養子雙喜爲嗣。更名洪基。

自成大修長安城。閱兵渭橋。親自較射。衣藍布袍。乘馬。張小黃蓋。百姓望見皆走避。分兵畧鄜延。中部知

縣華堞死之。上聞潼關陷。命兵部侍郎余應桂總督陝西三邊。相機勦賊。應桂中道遷延。竟不赴。○以左副都御史方岳貢爲東閣大學士。○十一月李自成命田斌守西安。自往延安。高傑聞賊至。走山西。王定走榆林。自成詣米脂。祭墓築土封之。先爲汪喬年所發。訪求

宗人。贈金封爵乃去。改延安府爲天保府。所過慰諭父老。禁侵暴。未幾軍士剽掠婦女。責富戶出金。秦民遂失望。時宿將左光先。陳永福等皆降。是月自成屠鳳翔。遣使招榆林諸將。榆林兵備副使都任總兵王世顯。侯世祿。侯拱極。尤世威。惠顯等。歛各堡精銳入

城召將士問守乎降乎各言願死守遂推世威主號令賊招降三日不聽四面環攻城上強弩叠射賊屍山積更發大礮擊之賊稍却諸將出戰殺賊萬人賊攻益力以衝車穴城崩數十丈賊擁入都任巷戰被執賊曰好男子無憂不富貴任大罵遂遇害世威縱火焚其家百口揮刀突戰而死諸將巷戰賊大至督餉員外郎王家錄諸將王世欽王世國李昌齡等死事者數百人婦女俱自縊榆林為天下勁兵處頻年餉絕軍士饑困殫義狗國志不少挫合城男婦無一人屈節辱身者榆林既陷寧夏總兵官撫民降三邊

皆沒

都任字弘若祥符人萬曆四十一年進士

○自成陷慶陽執韓王兵

備副使段復與董琬在籍太常寺少卿麻禧皆死之

屠其城前鋒入山西陷平陽殺西河王等三百人高

傑走澤州山西郡縣及莊浪涼州二衛皆降遂陷甘

州甘肅巡撫林日瑞副將郭天吉總兵官馬廣撫標

中軍哈維新姚世儒監紀同知藍臺在籍總兵官羅

俊傑皆死之

日瑞字浴元詔安人萬曆四十四年進士贈兵部尚書藍臺光山人贈太僕寺

少甘民被殺者四萬七千餘人

十二月誅前吏部文選司郎中吳昌時賜前大學士

周延儒死

以龍文光代陳士奇為四川巡撫。士奇方候代，瑞王避闖賊，自漢中來奔。總兵官趙光遠擁兵二萬為衛士民相從避難者。又數萬人突入保寧蜀人大恐。士奇馳赴之。責光遠曰：兵以衛民，若退守陽平關為吾捍衛，吾不惜三萬金犒軍。若頓此需餉，不可得也。光遠乃退屯陽平。士奇請王以三千騎入處重慶，民竟無譁。

明年四月，張獻忠陷夔州。時文光受代，士奇當行。蜀人雷之遂入重慶。賊屯忠州，胡蘆垵四十餘日。乃左步右騎翼州而上。時參將會英守涪州水路。趙榮貴守梁山陸路。六月，遇賊並敗走。賊奪佛圖關陷涪州。人言公已謝事，宜速去。士奇不可。誓守重慶。城與賊相持月餘。城陷，士奇及副使陳縵、知府王行儉、知縣王錫俱被執。并執瑞王。賊縛諸人於教場，將殺之。忽雷雨晦冥，獻忠仰而誦曰：我殺人何與天

事用大砲向天叢擊，俄而天霽。士奇罵賊死，王亦遇害。縵本關南兵備道，護瑞王入蜀。至是與指揮顧景同死。獻忠集重慶軍民斷其臂，凡三萬七千餘人，囚率眾犯成都。士奇字平人，漳浦人。天啓五年進士。

甲戌十七年是歲為

大清世祖章皇帝順治元年春正月，李自成稱王於西安，更名自晟，偽國號曰順。建元永昌。造甲申曆，以牛金星為丞相，更定六政府尚書等官。按冊部兵四十萬，騎兵六十萬，設科目取士。

以甯紹先充考試官，試定鼎長安賦取扶

風舉人張定。○張獻忠棄長沙，造浮橋於三江口，率

步騎數十萬上荊州。時老回回為李自成守荊州。先老回回降，與獻忠修舊好，不為阻。獻忠遂入夔州。

是於自成

十月賊騎兵由資陽水兵由洪雅新津薄城都城下四面縱火急攻成都陷巡撫龍文光率兵拒戰兵敗死之蜀王闔宮遇害獻忠將盡屠蜀人孫可望力諫乃止獻忠親信大將四人平東將軍孫可望撫南將軍劉文秀安西將軍李定國定北將軍艾奇能皆養子也十月十六日獻忠即西王位國號西建元大順以成都為西京以汪兆麟為左丞相嚴錫命為右丞相設六部尚書又惡文人姦盜詐偽貪汙狼籍及迂腐偏見者以故殺蜀紳士殆盡嘗一日自殺偽官二百餘人或言太甚獻忠曰文官怕没人做邪朝會拜伏呼葵數十下殿葵所嗅者引出斬之名曰天殺左右詞事小兒千百人夜則周行街巷聽人語犯者白聖識其門黎明而收者至禁民間蓄馬詭考武生出廐馬最濼劣者使騎既上發大砲合營大喊馬驚人墮賤為肉泥賊撫掌歡笑詭開科取士不至者孥戮既至盡殺於西門外青羊宮凡殺二萬二千三百人棄筆視如丘塚全川惟遵義未下獻忠既殺蜀士民又欲殺蜀民之為兵者賊將劉進忠守漢中多用川兵獻忠謀阬其眾漏言於閻者一軍聞之盡逃會大清兵至漢中進忠迎降問獻忠所在進忠曰在順

慶府金山舖為西充鹽亭交界去此千餘里疾馳五晝夜可及獻忠以進忠守朝元關殊不為意進忠領官軍入營指示善射者曰此獻忠也發一矢中額逃伏積薪下拽出斬之孫可望等四將奔滇黔上憂寇臨朝而嘆大學士李建泰進曰臣晉人知賊中事臣願以家財佐軍可資數月糧請提兵西行上遣駙馬都尉高煒以特牲告太廟廷授建泰節鉞備法駕御正陽門宴餞之上手賜卮酒曰先生此去如朕親行建泰頓首謝趨出御肩輿不數武杆折人謂不祥建泰出都聞山西被賊家已破進退失措逡巡畿內而已

二月李白成率賊眾過河牛金星顧君恩宋獻策宋

企郊鞏煇陸之祺張璘然喻上猷李振聲楊王休黎志陞皆從陷蒲州汾州河曲懷慶不守福王出奔與太妃相失遂至衛輝依潞王○自成至太原原任巡撫蔡懋德遣驍將牛勇朱孔訓出戰二將陣亡一軍皆沒是月初八日晝晦天大風部將張雄與賊通城遂陷執晉王懋德與副將應時盛皆死之布政使趙建極按察使陳純德及府州縣官死者四十六人懋德字維立崑山人萬曆四十七年進士謚忠襄祠祀上下詔罪已曰朕嗣守鴻緒十有七年深念上帝陟降之威祖宗付託之重宵旦兢惕罔敢怠荒乃者災

害頻仍流氛日熾赦之益驕撫而輒叛甚有受其煽惑頓忘敵愾者朕爲民父母不得而卵翼之民爲朕赤子不得而懷保之坐令秦豫丘墟江楚腥穢罪非朕躬誰任其責所以使民罹鋒鏑蹈水火殫量以壑骸積成丘者皆朕之過也使民輸芻輓粟居送行齋加賦多無藝之征預支有稱貸之苦者又朕之過也使民室如懸罄田卒汙萊望烟火而無門號冷風而絕命者又朕之過也使民日月告凶旱潦洊至師旅所處疫癘爲殃上干天地之和下叢室家之怨者又朕之過也至於用大臣而不法用小臣而不廉言官

植黨而清議不聞。武將驕懦而軍功不奏。皆由朕撫馭失道。誠感未孚。中夜以思。跼蹐無地。朕自今痛加創艾。深省夙愆。要在惜人才以培元氣。守舊制以息煩囂。行不忍之政以收人心。蠲額外之科以養民力。其罪廢諸臣。有公忠正直。廉潔幹才。尚堪用者。不拘文武吏兵二部。確覈推用。草澤豪傑之士。有恢復一郡一邑者。授官世襲。功等開疆。卽陷沒脇從之流。能舍逆返正。率衆來歸。許赦罪立功。能擒斬闖獻二賊。仍予封侯之賞。於戲。忠君愛國。人有同心。雪耻除凶。誰無公憤。尚懷祖宗之厚澤。助成底定之太勲。思克厥愆。歷告朕意。

賊攻代州。總兵周遇吉力戰殺賊萬餘人。兵少食盡。退守寧武關。○賊前鋒至大安驛。真定知府丘茂華聞警。遣家口出城。總兵徐標執茂華下獄。軍士殺標出茂華。近京三百里。無究其事者。

詔徵天下兵。勤王命。府部大臣各調戰守事宜。左都御史李邦華少詹事。項煜右庶子。李明睿請南遷。上怒甚。曰。國家至此。無一忠臣義士爲朕分憂。而所謀乃若是。國君死社稷。朕志已定。毋復多言。○李自成薄寧武關。傳檄五日不下。且屠。總兵周遇吉悉力拒

守發大砲擊賊殺萬人會火藥盡遇吉悉兵出戰斬賊數千級賊將退或言我衆彼寡使主客分別以一击十可殲也引兵復進迭戰脫帽以自別官軍且盡遇吉焚其妻子揮刀突陣中流矢被執罵賊不屈死之自成嘆曰使守將盡如周將軍吾安得至此三月己丑朔李自成兵至大同城下總兵姜瓖射殺永慶王開西門迎賊使人詐請巡撫衙景瑗議事景瑗乘馬出知有變自墜馬下爲賊所執自成欲官之景瑗不屈據地大哭自成曰忠臣也勿殺景瑗猝起以頭觸階石流血被體賊使其母勸降母曰吾今年

八十餘當自爲計兒封疆大臣不可不死母出景瑗語人曰吾所以不罵賊者全母也自經而死賊皆感嘆移其家於別所戒勿犯總兵官朱三樂督餉戶部

郎中徐有聲朱家仕皆死之賊盡殺代府宗室

景瑗字仲

玉韓城人天啓五年進士弘光時贈兵部尚書謚忠毅與朱之馮並列祠祀

庚寅名諸臣於中極殿問今日方畧有言當今之急無如考選科道上默然是日命太監分守九門諭文武各官輸助○辛卯督師李建泰上言請駕南遷願奉太子先行壬辰上諭閣臣曰李建泰有疏勸朕南遷國君死社稷朕將何往大學士范景文及李邦華

諸臣皆亡國之臣

項煜請先奉太子撫軍江南兵科給事中光時亨大聲曰諸臣將爲靈武故事乎景文遂不敢言上復問戰守之策諸臣默然上曰朕非亡國之君諸臣皆亡國之臣遂拂衣起○詔封總兵官吳三桂平西伯左良玉寧南伯唐通定西伯黃得功靖南伯詔棄寧遠徵吳三桂王永吉率兵入衛大同既陷宣撫朱之馮集將吏於城樓設高皇帝位歃血誓死守監視中官杜勛總兵王承胤先遣人納款賊將至勛蟒袍鳴騶郊迎三十里將士皆散之馮登城見大砲語左右爲我發之無應者自起焚火或從後掣其肘之馮拊膺

嘆曰人心離叛一至於此俄而賊薄城承胤開門降城中人結綵焚香以迎左右欲擁之馮出走之馮大怒南向叩頭草遺表勸上收人心培氣節遂自縊死賊棄屍濠中濠旁羣犬日食人屍獨之馮無損同時殉難者督糧通判朱敏泰諸生姚時中皆自縊死副將甯龍罵賊死繫獄總兵官董用文副將劉九卿在籍知縣申以孝皆不屈而死

之馮字樂山順天大興人天啓五年進士弘光

時贈兵部尚書謚忠壯

唐通及太監杜之秩守居庸劉澤清南奔○賊入保定李建泰卧疾被執鄉官金敏峒死之○癸卯賊自

柳溝抵居庸關。總兵唐通監視太監杜之秩迎降。撫臣何謙遁去。總兵官馬岱自殺。京師以西諸郡縣望風瓦解。詔三大營屯齊化門外。○甲辰賊陷昌平州。焚十二陵享殿。總兵李守鏢自殺。監視太監高起潛走西山。賊分兵掠通州糧儲。是夜賊直犯平則門。竟夕焚掠。火光燭天。京師內外城堞凡十五萬四千有奇。京營兵守陴者僅五六萬人。無炊具。市飯食。人給百錢。無不愁怨。賊久窺畿甸。先遣其黨輦金錢瓊罽。飾爲大賈。列肆都門。或挾貲充衙門書吏。專刺陰事。都中遣人出探。賊必知之。無得還者。○乙巳上早朝。

對諸臣俛首而泣。俄聞賊大至。攻平則彰義門。城外三大營皆潰降。火車巨礮。疾藜鹿角。皆爲賊有。賊反礮攻城。襄城伯李國楨匹馬馳闕下。內侍呵止之。國楨曰。此何時也。君臣卽求相見。不可得矣。內侍問其故。國楨曰。守軍缺餉已五月。皆不用命。鞭一人起一人復臥。奈何。上召入。因命內臣皆守城。凡數千人。○是日李自成自宣府抵京師。○丙午封劉澤清東平伯。○賊攻西直平則德化三門。李自成對彰義門設座。秦王晉王左右席地坐。降賊太監杜勳欲入城。王承恩縋之上。入見大內。盛稱賊勢。大皇上可自爲計。

昌平守陵太監申芝秀降賊亦縋上入見請上遜位
上怒叱之諸內臣請劉勳勳曰秦晉二王在不返危

矣乃縱之出勳語守城內臣王則堯褚憲章曰吾輩

富貴自在也

初聞勳在宣府殉難贈司禮監蔭錦衣衛指揮僉事立祠至是乃知其從逆

是日太監曹化淳獻彰義門賊率大隊入沿途殺掠

是夕內城陷上幸南宮登萬歲山王承恩從徘徊逾

時回乾清宮命進酒連沃數觥嘆曰若我民爾命以

太子永王定王分送外戚周田二家皇后至撫太子

二王慟甚上命之出后自經召公主至謂曰爾何生

我家揮刀斫之未殊死手栗而止又殺袁貴妃及所

御大嬪數人仍回南宮登萬歲山壽皇亭自盡太監

王承恩從死焉帝裾前有書曰朕自登極之十七年

逆賊直逼京師雖朕薄德匪躬上千天咎然皆諸臣

誤朕也朕死無面目見祖宗於地下去朕冠冕以髮

覆面任賊分裂朕屍勿傷百姓一人

帝崩於丁未昧爽尚衣監何新

入宮見公主斷肩仆地命宮人救甦公主曰父皇賜

我死安敢求生新曰賊將人恐受辱且至國丈府避

之順治二年公主詣闕上書願入空門詔求元配公

主名徽媿年十五許降駙馬都尉周世顯行有日矣

以寇警暫停至是嫁以公主禮士田郎第錫賚有加
既婚公主痛念先帝后抱疾而歿松江張宸為之誄
曰嗟夫乘鴟扇引定情於改朔之朝金犢車來降禮
於故侯之第人非鶴市慨紫玉之重生鏡異鸞臺看
樂昌之再合金枝秀發玉質含章逢德耀於皇家迓
桓君於帝女然而心念宮幃神傷輦路重雲華陌何

配 詔求元

心金榜之門飛霜穀林豈意玉簫之館弱不勝悲溘
焉薨逝當扶桑上仙之日距穠李下嫁之年星燧初
周芳華未歇嗚呼悲哉都尉君悼去鳳之不留嗟沉
珠之在殯銀臺猶藥想奔月以何年金殿煎香思返
魂而無術越明年三月葬於彰義門之賜園禮也小
臣哀薄遊京輦式覩遺容京兆雖阡誰披柩館所連
象塚祇叩松關擬傷逝於
子荆代悼亡於潘令謹誄
○丁未賊從東直門入殺
守門御史王章章抗賊不屈被執協理京營兵部右侍郎王
家彥死之自成入大內太監杜之秩曹化淳等前導
問帝所在大索不得次日始知帝崩於煤山賊以雙
扇昇帝后屍於東華門側柳棺蓬廠莫敢往哭者
辛丑改殯先帝后以天子之禮葬於田貴妃墓

附死難諸臣

大學士范景文投龍泉菴井中死○戶部尚書倪元
璐聞帝后崩南向拜謝其母諭家人曰吾死慎勿棺
衾以志吾痛若必欲斂俟大行斂方收吾屍遂自縊
一門從死者十三人○左都御史李邦華自縊於文
丞相祠賊至見其冠帶危坐爭前執之知其死驚避
去○左副都御史施邦曜自縊僕解之更飲藥死○
大理寺卿凌義渠作書別其父自繫奮身吭而死○
協理京營兵部右侍郎王家彥自縊死○刑部右侍
郎孟兆祥守正陽門賊至死於門下妻何氏亦死子
進士章明收葬父母畢亟歸語其妻王氏曰吾不忍

大人獨死。吾往從大人。妻曰：爾死，吾亦死。遂自縊。章明乃死。

左諭德馬世奇作書別母，端坐引帛，妾朱氏、李氏盛服而前曰：吾二人亦欲盡節。先自縊。世奇乃死。○左中允劉理順自縊。妻萬氏、妾李氏、子、子婦及僕婢從死者十八人。賊多河南人，至其居曰：此吾鄉。杞縣劉狀元也。居鄉有德，吾等奉將軍令來護衛，公何遽死也。數百人下拜，涕泣而去。○太常寺少卿吳麟徵守西直門，賊至同守者皆避去。麟徵獨留，城陷入三元祠，縊死。

右庶子周鳳翔遺書與父訣自縊死。○簡討汪偉賊偪都城，偉累日不食。妻耿氏請從死。及城陷，爲兩環於梁間，偉以便就右，耿就左。旣皆縊，耿曰：止止，雖在顛沛，夫婦之序不可失也。正左右序而死。○戶科給事中吳甘來城陷，有傳聖駕南巡者。甘來曰：上明且決，必不輕出，以家事託其兄禮部員外郎泰來。泰來子家儀奔至，慟哭。甘來曰：我不死，無以見君。汝父死，無以養親。古者兄弟同難，必存其一。遂引佩帶自縊。○監察御史陳良謨將自盡，謂其妾時氏曰：吾年逾五十，無子，汝幸有娠，倘生男，可延陳氏一脉。汝必勉。

之妾曰主人死吾將誰依與其受賊辱不如無子請先死以絕君念乃自縊良謨與之同盡○監察御史陳純德提督北直隸學政行部至易水試未畢聞都城圍急奔還城陷死之

四川道御史趙誤巡視中城捕賊間諜誅之城陷獲誤誤瞋目大罵賊怒殺於白帽衙衙○吏部員外郎許直城陷相傳帝從齊化門出直曰四面兵戈駕將安往爲書報其父自縊死

兵部郎中成德詣東華門陳雞酒哭奠梓宮前賊以刃脇之不爲動歸寓跪母張氏前慟哭母曰我知之

矣入室自縊死妻張氏亦死一于六歲德撲殺之然後自死○兵部員外郎金鉉賊攻城急鉉跪母張氏前曰兒受國恩職任車駕司城破義在必死今得一僻地可以藏母幸速往母曰爾受國恩我獨不受國恩乎事急廡下非是我死所也鉉慟哭卽辭母出視事十八日城陷鉉投御河從人拯救鉉嚙其臂赴深處時河水淺俛首泥濘而死報至母章氏投井死鉉妻王氏亦死其弟銖哭曰母死我必從然母未歸土何敢死棺斂其母葬三日覆墓畢投井死○光祿寺署丞于騰蛟夫婦同縊死○太僕寺丞申佳胤投井

死○副兵馬司姚成自縊死○中書舍人宋天顯賊
偏寫偽詔天顯擲筆大罵觸階死

中書舍人勝之所阮文貴皆投御河死○工部郎中
李逢甲主事王鍾彥皆自縊○經歷張應選自縊死
衛經歷施溥飲藥死

儒士張世禧與其子懋賞懋官俱縊死○布衣湯之
瓊見先帝梓宮過痛哭觸石死○襄城伯李國楨賊
昇帝后屍棺於東華門外百官過者莫敢視國楨踉
蹌奔赴大哭賊黨執見自成國楨復大哭以頭觸堦
流血被面賊衆持之自成好語誘降國楨曰有三事

從我卽降一祖宗陵寢不可發一葬先帝以天子禮
一太子二王不可害自成許諾爲易梓宮以丹漆殯
先帝黝漆殯先后帝翼善冠衮玉滲金靴后袍服亦
如之葬田貴妃墓惟國楨一人斬衰徒步往葬畢自
殺○新樂侯劉文炳賊破外城文炳曰身爲國戚義
當與國同難有女弟適李少寡名之歸與弟左都督
文耀擇一大井驅子孫男女及妹十六人盡投井中
縱火焚賜第文炳文耀投火中死祖母瀛國太夫人
卽帝外祖母也年九十八亦投井死
駙馬都尉鞏永固縛所生子女五人於樂安公主柩

前縱火焚室乃自剄。○太傅惠安伯張慶臻城陷盡散財帛舉家聚飲縱火自焚無一人得存者。○宣城伯衛如春全家赴井死。○東宮侍衛周鏡自縊死。○都指揮王國興自縊死。○指揮同知李若珪守崇文門城陷自縊死。○千戶高文采一家十七人皆自殺。○陽和衛經歷毛維章見賊不屈被殺。○大監王德化先帝未殯德化痛哭爭之出朝見兵部尚書張彥縉青衣待罪於皇極殿前德化叱之曰汝輩誤國至此今不亟殯先帝乃復推戴新主邪彥縉曰與我何于德化大怒連批其頰遂爲賊所殺。○太監王之俊自縊死。

錦衣衛指揮李若璉自縊死。○英國公張世澤清平伯吳尊周陽武侯薛濂博平侯郭振明永寧伯王長錫皆死之。

賊入京不能殉節者雖大臣亦被拘執逼獻財物極刑拷掠陳演仰藥死魏藻德自勒死方岳貢不食死丘瑜自經死賊充塞街巷恣意搶奪惟奉自成令不敢入殉節諸臣之家。

毀太廟遷太祖神主於歷代帝王廟。○是月二十日吳三桂入援抵豐潤聞京城已陷頓兵山海乞師於

大清長驅而入自成聞之大驚脇三桂父襄作書招
 降遣唐通犒師三桂出其不意盡殺守關賊○夏四
 月庚午李自成率其精銳六萬衆挾太子慈定王熉
 永王烱及吳襄東行甲戌向永平丁丑三桂擊賊於
 關門賊方合圍

大清兵至自成策馬先走賊衆奔潰巳卯三桂追賊
 至永平又破之自成還京師毀城外民房及牛馬墻
 三桂壓城而營自成合十八營拒戰官軍擊之賊死
 者二萬人自成殺吳襄懸首城上丙戌自成稱皇帝
 卽位於武英殿丁亥自成出齊化門西走三桂輕騎

追之賊馬驟皆重載自蘆溝至固安百里內所棄財
 物婦女塞路賊衆半散去追至保定賊還兵而鬪盡
 失其輜重追至真定復拒戰官軍擊之殺賊萬餘人
 自成中流矢拔營走山西追兵及關而止○五月三
 日

大清攝政王至京師命漢官李明睿爲禮部左侍郎
 謚先帝曰懷宗端皇帝皇后周氏曰烈皇后諭京城
 官民哭臨三日

按自成至平陽分兵守山西諸隘益發關中兵攻陷
 漢中復遣賊出潼關攻掠河南又遣賊將馬科入川
 掠保寧一路吳三桂入山西自成走西安
 大清兵西伐斬賊數萬僞官劉宗敏田見秀等皆死

順治二年春二月自成棄西安出商州龍駒寨走武關入襄陽宋企郊等皆道亡自成至武昌左良玉已南下武昌虛無人與李整李過高必正居武昌五十日夏四月由金牛保安走咸寧蒲圻南奔辰州留屯黔陽乏食遣賊四出抄掠沿途恣殺雞犬皆盡還過通城命其部眾先發自成二十騎殿後通城有九宮山一名羅公山上有神廟自成單騎登山村民慮為劫盜爭取所荷鍾擊之既斃視懷內有印取其首從山前逃騎兵候久跡之已無首矣李過聞自成死勒兵還赴葬之羅公山下滅一村而去村民因以其首獻湖督何騰蛟驗之左臚傷鏃乃知為自成也諸賊奉李過為主更名繡人湖南南山中後降於何騰蛟降武賜名李赤心

麟按明太祖以布衣從戎奄有諸夏其創業垂統軼宋而上駸駸乎與漢唐並立迨天下已治已安帶礪勲盟鮮克永世羣臣百姓誅鋤狼籍非刑平國用輕典之意也太孫嗣統削奪親藩南北水火自貽伊慙太宗正位重培邦本彝倫攸敘民氣和樂文德武功於斯為盛仁宣繼之周言成康漢言

文景不是過矣英宗輕舉妄動自陷土木景泰為德不終南宮復辟思益前愆頗有善政憲宗朝治亂相半孝宗晚節簡任老成惜武宗不克負荷幾致隕越世宗初政清明其後惑於長生之說遂無足觀彥宗昏庸神宗幼冲賴元輔之力十餘年間海宇清宴府庫充實其後四海旁落內外臣工分立門戶黨同伐異而總以攻宰相訐邊臣為立名之始由是朝廷蕪穢邊疆淪沒天下事不可為矣光宗一月上賓熹宗委身客魏天命已去人心已離莊烈帝手翦元凶宵旰圖治維時天子孤立於上公卿大夫無足與計事者加以東西交迫盜滿中原水旱疾疫徵輸孔亟闖逆乘釁犯闕帝拒遷都之議守死社稷自古亡國未有如帝之正者也明紀洪武戊申至崇禎甲申十六主合二百七十七年甲申夏五月大清定鼎於燕京曆數有歸福王唐王桂王附編年之例云

明史紀事本末

